

Inatsisartut Suleriaasianni § 33, imm. 3, nr. 1 naapertorlugu Nunat Avannarliit Killiit Killiit Siunnersuisoqatigiiffianni aallartitanut Siulittaasup aalajangiiffigisassatut siunnersuut manna saqqummiuppaa:

Nunat Avannarliit Killiit Killiit Siunnersuisoqatigiiffiata kaammattuutit aalajangersagaanut nr. 2/2020-mut Inatsisartut tapersiinissaat pillugu Inatsisartut aalajangiiffigisassaattut siunnersuut:

**Savalimmiuni, Kalaallit Nunaanni Islandimilu Naalakkersuisut issittumi suliassaqarfiit pillugit suleqatigiinnissamik Nunat Avannarliit Killiit Siunnersuisoqatigiiffiannit kaammattorneqarput – tassani Naalakkersuisut issittoq pillugu akisussaaffillit, ikinnerpaamik ukiumut ataasiarlutik naapittassallutik – tamatumani:**

- Nunat Avannarliit Killiit Issittumi soqutigisaannik nukittorsaallutillu ataqatigiissaarisassasut
- Issittumi allanngoriartortoqarneranut atatillugu atlantikup avannaata isiginiarneqarnissaa sulissutigissagaat
- Issittumi allanngoriartornermut atatillugu nunani avannarlerni killerni imaani, pinngortitami, kiisalu inuit inuussutissarsiornerlu eqqarsaatigalugit piujuaannartitsinermik tunngaveqarluni iluarsiissutissanik nassaarniarlutik sulissutiginnissasut
- Nunat Avannarliit Killiit Siunnersuisoqatigiiffiannut ataqatigiissaakkamik paasissutissiisarlutik – matumani aamma Nunat Avannarliit Siunnersuisoqatigiiffianni Issittumi suliassaqarfiit pillugit suleqatigiissitamut – Issittumi suliassaqarfiit kiisalu Issittoq pillugu Siunnersuisoqatigiit eqqarsaatigalugit nunat avannarliit killiit naalakkersuisuisa kissaataannut tunngatillugu.

(Aallartitat siulittaasuat Pipaluk Lyng-Rasmussen)

### **Tunngavilersuut**

Ullumikkut silaannaap allanngoriartornerata sikullu annikilliartornerata malitsigisaannik periarfissat nutaat pilernerini Issittoq tassaavoq sallsaalluni inissisimasoq. Periarfissanulli taakkununga nutaanut peqatigitillugu pisinnaatitaaffiit pillugit akerleriittoqalerpoq, kiisalu patajaatsumik piujuaannartitsinermillu tunngaveqartumik ingerlatsisoqarnissaa qulakkeerniarlugu nunat tamat akornanni ataqatigiissaarinerup pisariaqarnera ullormiit ullormut annertusiartorpoq.

Nunat pissaanilissuit USA Canadalu kiisalu Rusland Kinalu – soqutigisatig qulakkeerniarlugit suliniuteqarput. Taamatuttaaq nunat allat soqutigisaminnik sulissutiginnippat. Savalimmiut,

Kalaallit Nunaat aamma Island Atlantikup avannaani Issittumut isaaviupput, aamma nunat naalagaaffiillu avannarliit killiit ataatsimoorlutik Issittumi pissaanilissuupput.

#### *Atlantikup avannaani Issittumut isaariaq*

Issittumi allanngoriartornerit atlantikup avannaanut, nunarsuup immikkoortuanut avannarlermut killermut annertuumik sunniuteqarput. Assersuutiniq taasaqassagaanni oqaatigineqarsinnaavoq, silaannaap allanngoriartornera aalisakkat sorliit siunissami imartatsinniissinnaanissaannut aalajangiisuujumaarpoq, aalisariaatsinullu nutaanut naleqqussartariaqarnissaq pisinnaatitaaffinnillu nutaanik isumaqatigiinniuteqartarnissaq tamatumunnga piumasqaataassaaq.

Aammattaq atlantikup avannaani umiarsuarnik assartuussineq malunnaatilimmik annertuserujussuuartussaavoq. Tamatumani ujaasisarnernik annaassiniaasarnernillu (SAR) nukittorsaanissaq ataqatigiissaarinissarlu piumasqaataassaaq kiisalu avatangiisinut tunngatillugu piumasqaatitaqassalluni, aammattaarli kiffartuussinikkut neqerooruteqarnissamut inuussutissarsiutinillu suliffinnillu nutaanik pilersitsinissamut periarfissiissaaq. Taamatuttaaq atlantikup avannaani Issittumilu assartuussinikkut periarfissat pitsaaneruleriartornerat ilutigalugu nunarsuup immikkoortuani tassani takornariaqarneq annertusiartussaaq. Tamannattaq piumasqaatinik nutaanik nassataqassaaq ataqatigiissaarinermillu piumasqaateqassalluni.

#### *Nunani Avannarlerni Killerni naalackersuisutigut Issittoq pillugu suleqatigiinneq*

Nunani Avannarlerni Killerni soqutigisat qulakkeerneqassappata nunarsuullu avannaata kita – Issittumi allanguutinut tunngatillugu – tusaaniarneqassappat sapinngisamillu pitsaanerpaamik isumagineqassappat tamakkuninnga ataqatigiissaarisooqartariaqarpoq.

Tamanna assersuutigalugu naalackersuisut Issittumi suliassaqarfinnut akisussaasut ukiumoortumik ataatsimeeqatigiittarnerisigut, pisariaqartitsinerlu naapertorlugu ataatsimiittarnertigut allatigut ingerlanneqarsinnaavoq.

Aammattaq Nunat Avannarliit Killiit Siunnersuisoqatigiiffiat Issittoq Pillugu Siunnersuisoqatigiinni alaatsinaatsutut inissisimavoq. Nunani avannarlerni killerni naalackersuisunit Nunat Avannarliit Killiit Siunnersuisoqatigiiffiannut tassanilu Issittumi suliassaqarfiit pillugit suleqatigiissitamut ataqatigiissaakkamik paasisutissiisarneq Nunat

Avannarliit Killiit Siunnersuisoqatigiiffiata atuuffiitut Issittorlu pillugu Siunnersuisoqatigiinnut aallartitaanut aamma nukittorsaataassaaq.

Nunat Avannarliit Killiit Siunnersuisoqatigiiffiata Issittoq pillugu Siunnersuisoqatigiinnut alaatsinaatsutut inissisimalernera siuariarneruvoq, avannaataliuna kitaani nunat Issittumi soqutigisaat tusarneqarnissaallu nukittorsarniarlugit naalakkersuisutigut qaninnerusumik suleqatigiinnissaq ataqatigiissaarinissarlu pisariaqartoq.

Taamaammat Savalimmiuni, Kalaallit Nunaanni Islandimilu naalakkersuisut Issittumi suliassaqarfiit pillugit suleqatigiinnermik qaninnerusumik pilersitseqqullugit Nunat Avannarliit Killiit Siunnersuisoqatigiiffiannit kaammattorneqarput.